



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
12 Outubru 2018

Estrutura Suku Kaikua no Suku Dilor partisipa iha treinamentu kona-ba knaar órgaun soberanu no partisipasaun públiku iha prosesu halo lei no asesu ba justisa formál

Iha 4 Outubru 2018, JSMP, kontinua habelar informasaun ba autoridade suku, membru konsellu suku, membru Konsellu Polisiamentu Komunitáriu (KPK) no comunidade sira iha iha Suku Dilor, Postu Administrativu Lacluta, Munisípiu Viqueque. Treinamentu ne'e partisipa husi autoridade suku, membru konsellu suku, membru Konsellu Polisiamentu Komunitária (KPK) sira. Totál partisipante hamutuk ema na'in 30 ne'ebé kompostu husi feto na'in 12 no mane na'in 18.

Antes ida-ne'e iha 1 Outobru 2018, treinamentu hanesan mós halao iha Suku Kaikua, Postu Administrativu Vemase, Munisípiu Baucau. Treinamentu refere partisipa husi ema na'in 30 kompostu husi feto na'in 17 no mane na'in 13.

Treinamentu ne'e ho objetivu atu hasa'e koñesimentu membru konsellu suku no membru comunidade sira ne'ebé iha influénsia iha comunidade relasiona ho prinsipiu baziku sira kona-ba saida mak demokrasia, kna'ar órgaun soberanu sira idaidak nian, oinsa partisipasaun publiku iha prosesu halo lei no asesu ba justisa formál. Aleinde ne'e, treinamentu ne'e mós ho objetivu ida atu promove divulgasaun liutan liuhosi partisipante sira ne'ebé partisipa iha treinamentu ne'e atu hatutan sira nia koñesimentu ne'ebé sira hetan ba membru comunidade sira ne'ebé la marka prezensa.

“Materia sira ne'ebé apresenta iha treinamentu ne'e extremamente importante no relevante ba papél no knaar sira estrutura suku no membru KPK sira inklui mós membru comunidade sira seluk. Atraves hosi treinamentu ne'e bele hasa'e sira-nia koñesimentu no asegura katak partisipantes sira sei dezempeña sira-nia servisu lorloron ho efektivu tuir koñesimentu ne'ebé atualizadu bazeia enkuadramentu legál sira ne'ebé vigor iha Timor-Leste”, dehan Diretór Ezekutivu JSMP, Luis de Oliveira Sampaio.

Materia treinamentu refere fahe ba iha sesaun rua. Sesaun dahuluk kona-ba demokrasia, knaar órgaun soberanu no partisipasaun públiku iha prosesu halo lei. Sesaun daruak kona-ba assesu ba sistema justisa formál.

Iha sesaun abertura Sr. Luis Correia ne'ebé hanesan Administradór Postu Administrativu Vemase haktuir katak formasaun ida-ne'e importante tebes ba estrutura suku sira liuliu ba prosesu halo lei no implementasaun ba lei sira tuir ida-idak nia natureza no oin sa mak ita nia intervensaun no kompetensia tuir lei haruka.

Enkuantu Sr. Jose Andrade dos Santos representante administrador Postu Administrativu Lacluta, konsidera JSMP nia prezensa nu'udar premeiravés husi instituisaun hotu inklui Governu

iha sira nia suku. Sr. Santos reforsa katak desde ukun-an to'ohin lora, foin primeiravés maka JSMP ba fahe informasaun relevantes sira liuhosi atividade formasaun kona-ba demokrasia, knaar órgaun soberanu no partisipasaun públiku iha prosesu halo lei no asesu ba justisa formál. Tanba ne'e, materia hirak ne'e útil tebes ba estrutura Suku Dilor hodi bele kompriende no la'otuir saida mak lei dehan no hatene di'ak kona ba sira-nia kompeténsia hodi bele uja iha sira-nia knaar lorloron nian bainhira hasoru problema ruma.

Asuntu no preukupasaun importante sira ne'ebé partisipante sira foti durante sesaun treinmentu hirak ne'e mak kestaun Parlamentu Nasionál la aprova programa Governu VII nian no kestaun disolusaun ba Parlamentu Nasionál nomós kestaun eleisaun antesipada. Partisipante sira kestiona katak la justu ba sira tanba sira hili tiha deputadu sira ba tur iha Parlamentu Nasionál, sira la haree didiak programa governu nian hodi aprova atu bele hatan ba nesesidade povu nian, maibé sira rejeita fali. Tanba ne'e partisipante sira husu se iha opsaun ka dalan ruma atu bele halo prosesu hasoru deputadu sira ka lae. Aleinde ne'e partisipantes sira mós kestiona kona-ba disolusaun Parlamentu Nasionál no eleisaun antesipada.

Relasiona ho kestaun no preukupasaun sira ne'e, JSMP esplika katak bainhira partidu polítika ne'ebé kaer ukun la iha maioria parlamentár hodi foti desizaun iha Parlamentu Nasionál, Governu ne'e fasilmente monu tanba nia programa la pasa no ida ne'e prátika normál iha polítika no Konstituisaun RDTL mós prevee kona-ba ida ne'e. Ne'eduni, la iha dalan atu prosesa deputadu sira ne'ebé rejeita programa Governu nian ne'e no realidade hirak ne'e nu'udar rezultadu hosi evolusaun demokrasia iha Timor-Leste. Rejeisaun programa governu nian nu'udar pratika konstituisiónal tanba garantidu iha konstituisaun.

Enkuantu asuntu disolusaun Parlamentu no eleisaun antesipada, JSMP esplika katak disolusaun Parlamentu Nasionál nu'udar *rekursu ultimu* (dalan/opsaun ikus) ba solusaun empase politika iha momentu ne'ebá. Tanba mezmuke Governu apresenta fali nia programa ba iha Parlamentu Nasionál sei iha possibilidade boot liu atu hetan rejeisaun hosi partidu opozisaun maioria parlamentar. Bainhira Parlamentu Nasionál disolve ona, tenke iha eleisaun foun hodi hili fali partidu politiku foun atu ba halao knaar iha Parlamentu Nasionál. Eleisaun nu'udar meius atu fó lejitimidade ba deputadu eleitu sira atu bele hala'o knaar sira iha Parlamentu Nasionál intermus halo lei, fisikalizasaun no foti desizaun polítika hanesan prevee iha Konstituisaun RDTL.

Iha parte asesu ba asesu ba justisa formal, partisipante sira levanta kona-ba kestaun violénsia domestika ne'ebé mak akontese iha familia no ikus mai rezulta soe malu no abandona labarik sira.

Hatan ba kestaun ne'e, JSMP esplika katak bainhira akontese violénsia doméstika tantu komete husi laen ka feen ka husi membru familia ida kontra membru ida seluk, ida-ne'e tuir lei konsidera hanesan natureza krime publiku. Tanba ne'e se deit mak hare krime ida ne'e akontese tenke ba hato'o denuncia iha instituisaun relevante hanesan ba polisia ka ba ministériu publiku. Bainhira tama ona ba autoridade polisia ka ministériu públiku labele ba dada fila fali no nia desizaun ikus tenke mai duni husi tribunál. Prezensa Lei Kontra Violénsia Doméstika objetivu atu prevene violénsia doméstika, proteze no fó asisténsia ba vitima sira. Enkuantu kazu divorsiu ida ne'e buat ketak ida no nia prosesu tenke liu husi prosesu sivíl.

Aleinde ne'e, kazu abandona oan lei mós permite husu ba tribunál atu bele ba hato'o keixa ba ministériu públiku atu husu responsabilidade ka obrigasaun alementar ba aman ka inan ne'ebé abandona ninia-oan. Tuir artigu 225 Kódigu Penál konsidera hanesan krime la halotuir obrigasaun alimentár. Artigu ida-ne'e define katak ema ne'ebé iha obrigasaun atu fó alimentu no iha kondisaun atu halo tuir obrigasaun ne'e maibe la halo tuir obrigasaun ne'e to'o hamosu perigu ba alimentadu atu laiha meu hodi satisfáz nia nesesidade fundamental, maske ema seluk hadok tiha perigu ne'e, sei hetan pena prizaun too tinan 3 ka multa.

Partisipantes sira konsidera katak atividade ne'e importante teb-tebes, tanba ne'e partisipante husu ba JSMP atu kontinua divulga informasaun sira hanesan ne'e ba sira. Partikularmente sira preukupa tanba atividade lora ida deit la'os ideal atu bele aprende no kumpriende ho diak asuntu sira ne'e.

Treinamentu ne'e realiza tanba hetan apoiu hosi Governu Austrália liuhosi Embaixada Austrália iha Timor-Leste

Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
Telefone: 3323883 | 77295795